

隨

園

全

集

詩

話

隨園詩話卷九

倉山居士著

白下布衣朱草衣少時有破樓僧打夕陽鐘之句因之得名晚年無子卒後塋清凉山余爲書清故詩人朱草衣先生之墓勒石墳前余宰溧水蒙見贈云疊爲花縣一江分來往惟攜兩袖雲待客酒從朝起設告天香每夜來焚自慚龍尾非名士肯把猪肝累使君却喜循良人說徧填渠塞巷盡傳聞郊外云亂鴉多在野深樹不藏村與客夜集云羈身同海國歸夢各家鄉大觀亭云長江圍地白老樹隔朝青晚行云土人防虎門書字水屋叉魚樹有燈贈某侍御云朝罷宮袍多質庫時清諫紙盡鈔書

隨園地曠多樹木夜中鳥啼甚異家人多怖之予讀王荳亭進士平溝早發云怪禽聲類鬼暗樹影疑人先得我心矣其他佳句如大星高出樹殘月細流溪月斜人影忽在水風過秋聲正滿山滿帽黃花逢醉客一肩紅葉識歸樵皆妙

湖州潘進士立亭名汝晟詩宗韓杜五古尤佳偶成云靜士難爲介靜女難爲媒嫁容靜女醜交面靜士羞盛年易晚獨抱無驛郵桃李非我春蒲柳非我秋鶴老心萬里鵬怒翼九州未免笑樊援豈屑伍喧啾撥春潤章句摘卉膏吟哦非無蘭茗玩風騷旨已譌詩濤與詩骨韓孟兩嵯峨昆體逮鐵體滔滔同一波金天削秀華碧海鳴神鼉義色少姚佚吉詞無淫頗褒中南風手請爲南風歌寥寥發古響羯鼓如予何潘宰直隸某縣以迂緩故幾被劾矣適傳忠勇公平金川歸潘獻饒歌公大誇賞乃改爲卓薦

鮑進士之鍾字雅堂詩人步江之子詩有父風而清逸處往往突過前人秋雨乍晴云簪帽

芒鞋準備秋稍晴便擬看山游江潮入郭無三里溪水到門容一舟亭午白雲開野徑夕陽黃葉下僧樓閒身自笑如閒鶴欲度前峯却又休五言如一鳥掠溪鏡四山明畫簾魚跳重湖黑蒲喧急雨來七言如道心靜似山藏玉書味清於水養魚翻書細檢遺忘事撥火還尋未過香岸柳帶鴉明遠塔鈴和月語清宵皆可愛也雅堂常言作七古詩雅不喜一韻到底余深然其言顧甯人云詩轉韻方活三百篇無不轉韻

秦中詩人楊子安見訪適余外出歸後見貽一冊雪霽云寒瘦自性情苦吟工未能晚晴窗上日先曬硯池冰聞砧云滿院苔痕合重門樹影深

余宰江甯時所賞識諸生秦澗泉龔雲若涂長卿俱登科策而流落不偶者惟車靜研與沈瘦岑沈工古文不爲詩車詩有可存者河南道中云三月春陽淡不濃老冰如石漱寒風蹇驢覓路人家遠日暮山坳虎眼紅農家云築場如鏡草堆山遠屋黃花映碧潭閑倚茅簷看客過南人北去北人南

寶應王孟亭太守爲樓村先生之孫丁卯見訪江甯攜胡牀坐門外俟主人請見乃已遂相得甚懽聘修江甯志書朝夕過從嘗言樓村先生教人作詩以三山爲主一香山一義山一遺山也有從子嵩高字少林少年倜儻論詩不服乃伯而服隨園大梁懷古云搖落偏驚旅客魂秋風回首眺中原三花樹色開神岳萬里河聲下孟門形勝鬱鬱盤終古在英雄慷慨幾人存信陵策士俱黃土獨有侯生解報恩

揚州張哲士與蔣秋涇交好蔣尤自負作遊山一首程魚門夸爲小謝勃然怒曰分明大謝何小之有留別哲士云竟挂秋帆決計行關心天末倚閭情便歸只好留三月浪跡無端已

半生人世乘除蒼狗幻名山期許白頭成殷勤相屬還相慰愁聽西風雁一聲哲士寄懷云
戀友心空切甯親去敢遲纔爲三夕別已是百回思避日簾仍下追涼榻未移不知江上路
秋暑可曾衰哲士咏胭脂云南朝有井君王入北地無山婦女愁以此得名人呼張胭脂
中州李竹門過隨園見贈云園在六朝山色裡一筇先要問高臺碧梧葉響秋將至紅藕花
香客正來其詩頗清惜年甫三十而卒余愛其咏鞭云一事思量轉惆悵不能行到祖生先
郊外云山勢趁潮多北向人心如雁只南飛

蕪湖施長春曼郎少年有衛叔寶之稱余宰江甯時秦澗泉屢爲致意云將渡江求見已而
病亡有上塚歌云白楊樹城東路野草萋萋塋人處挈榼提壺出郭行可憐今日又清明富
家塚高高傍巔貧家塘低低亞畛塚中貧富人不同一樣酒澆不能飲暝烟慘淡日西斜挈
榼提壺還返家一線陰風旋不定紙錢飛上棠梨花

吳門顧星橋進士詩才清冠等夷家有月滿樓藏書萬卷海內知名之士無不交投縞紵予
目爲今之鄭當時龍潭一律云微風緩緩送江聲最好龍潭道上行碧樹數堪作障青山一
半不知名閑情轉向塵中得幽景偏宜客裏生晚覓茅齋投一宿花前試看酒旗輕進士名
宗泰

姚申甫方伯與沈永之觀察本中表親姚姊嫁沈二人年少時與余同肄業書院每見方伯
家遣僮擔盒供其子婿二人同登鄉會科沈寄姚詩云辛勤二老訓喃喃愛婿猶如愛長男
甘脆每教常健飯苦吟猶記許分甘沈殿試二甲第三姚二甲第二自後官堦沈必差姚一
級姚爲觀察沈爲太守沈爲觀察則姚爲方伯矣沈又寄詩云平生每好居人後今日還應

讓弟先余將赴廣西金撫軍之聘姚賦詩相留曰就使將軍重揖客何如南國有詞人後十四年姚竟巡撫廣西余寄書云不料當日所謂將軍即此時之閣下惜我不能來作揖客耳永之在書院寄內詩云深院蝶嬌無語坐小園花嫩卷簾看爲掌教楊文叔先生所賞

余在都時永之引見滿洲學士春臺春自云年三十時目不識丁從一禪師靜坐三月頗以爲苦一夕提刀欲殺禪師仰頭見月忽然有悟賦詩便工塞外云野水吞人面青山甕馬聲浮雲連帽起殘雪帶鞭行殊雄偉公愛永之與枚以爲兩少年必貴每至必留飲留宿遣妾捧觴

桐城相公七十生辰余與諸翰林祝壽宴罷各賜詩扇一柄詩寫田間雜興云不識風塵勞擾但知雲水盤桓買畚偶來城市祀神一著衣冠小橋流水村近疎柳長堤路斜車馬不聞叩戶雞豚自識還家烟生茅屋雲白雨過菱塘水新今歲秋田大稔稻苗養過行人竹屋正臨流水槿籬曲繞閒亭此是吾廬本色被人偷作丹青作苦最憐田婦布衣椎髻無華饁餉並稚子采桑不摘閒花公終身富貴而詩能淡雅若此

嚴公瑞龍作湖北布政使續漢上題襟集招諸詩人唱和亦公卿雅事也傳辰三感春云恰恰春分二月半分春妙手愛東君但愁過却花朝後一日春容減一分月落參橫夜向晨半釀花意欲留人夜闌莫怯風吹袂爲愛梅花不惜身大雨戲作云雨師一夕興淋漓筆尖亂點西窗紙初猶落蝌蚪分繼則盈盈垂霧似須臾漫漶一片濕直似秦碑沒字體殊有東坡風趣沈樹德落花云飛燕蹴歸簾影裡遊魚吹起浪花中葉聲木送人云吹酒涼風穿樹過破烟水月隔樓生

康熙壬寅余七歲受業於史玉瓚先生雍正丁未同入學先生不甚作詩而得句殊雋偶成云好鳥鳴隨意幽花落自然病中云廿年辛苦黔婁婦半世酸辛伯道兒終無子予爲塋於葛嶺

沈歸愚尙書晚年受 上知遇之隆從古詩人所未有作秀才時七夕悼亡云但有生離無死別果然天上勝人間落第咏昭君云無金贈延壽妾自誤平生深婉有味皆集中最出色詩六十七歲與余同入詞林紀 恩詩云許隨香案稱仙吏望見紅雲識 聖人與余同薦鴻詞者有戶部主事尙庭楓號茶洋陝西人爲人詭誕不羈忽而結駟連騎忽而布衣藍縷賦詩有奇氣如落花平地二尺厚芳草如天萬里青月華照樹有烏鵲雲氣上天如白羊皆警句也

余愛誦金壽門故人笑比庭中樹一日秋風一日疎之句杭董浦先生曰此句本唐人高蟾君恩秋後葉一日一回疎不足爲壽門奇壽門佳句如佛烟聚處都成塔林雨吹來半雜花咏苔云細雨偏三月無人又一年乃眞獨造余按古人佳句都有所本陳元孝池花對影落沙鳥帶聲飛本李羣玉沙鳥帶聲飛遠天梁藥亭龍虎片雲終王漢詩書餘火竟燒秦傲唐人半夜素靈先哭楚一星遺火下燒秦楊識齋不知落得幾多雪作盡北風無限聲傲唐人流到前溪無一語在山作得幾多聲

閨秀李金娥咏路上柳云折取一枝城裏去教人知道是春深湖州高氏小女有一聯云也知春色歸人早隣女釵邊有杏花

相傳江甯南城外瑞相院後叢竹中爲馬湘蘭墓望江魯雁門題詩云葉飄難禁往來風未

肯輸懷向狡童畫到蘭心留素素死依僧院示空空知音卓女情雖切薄倖王郎信未終一點憐才真意在青青竹節夕陽中絕世英雄寄女粧荆家曾說十三娘年來文士動相擠始識伊人不可忘零露似薰香豈惹百花想見繡衣裳平生除拜要離塚到此才焚一瓣香嚴侍讀冬友曰瑞相院前之墓少時亦誤以爲湘蘭後往訪之見題碣云新安貞女某氏之墓碑陰載爲某商人之妾商人不歸守貞而死以爲湘蘭有玷逝者矣陳楚筠曾效長吉體爲詩証明其事云古釵耿耿蝕黃土千歲老蟾嘯秋雨蒼茫落日掩平坡風入黃蒿作人語新安山高江水遙卷旆原不生倡條貞魂夜號月光曉兒童莫賦西陵草

余過京口丹徒宰徐天球字天石貴州人見示詩集一別之後遂永訣矣余愛其風箏一絕云誰向天邊認塞鴻但憑一紙可騰空任他風信東西轉百丈游絲在掌中

沈光祿子大許進士子遜二人齊名沈如竹光晨露滑池靜夜泉生許如鐘聲涼引月江氣夕沉山眞少陵也行役絕句有相同者沈云惟有夢魂吹不斷月明猶自逆風歸許云明月有情應識我年年相見在他鄉子遜先生與余爲忘年交論詩尊唐黜宋失之太拘有某少年故意抄宋詩之有聲調者試之先生悞以爲唐少年大笑余贈云前身合是唐宮女不唱開元以後詩

松江王太守名祖庚與乃祖文恭公同日生故號生同丁未進士終身以不入詞林爲恨兩子皆入翰林而先生不樂也與彭芝庭尙書同出尹文端公門下有納涼聞笛云碧空如水淨無雲斗轉參橫夜欲分長笛不知何處起好風偏送此間聞江梅片片傷春暮岸柳絲絲綰夕曛曲罷無端倍惆悵塔前涼露濕紛紛亦同余召試友也

學人之詩吾鄉除諸襄七汪韓門二公而外有翟進士諱灝字晴江者咏烟草五十韻警句云藉艾頻敲石圍灰尙撥爐乍疑伶秉簫復效雁銜蘆墨飲三升盡烟騰一縷孤似矛驚礮發如筆見花敷苦口成忠介焚心異鬱紆穢驚苓草亂醉擬碧箏呼吻燥甯嫌渴唇津漸得腴清禪參鼻觀沆瀣潤嚙胡幻訝吞刀並寒能舉口驅餐霞方孰秘厭火國非誣繞鬢霧徐結盪胸霜疊鋪含來思渺渺策去步于于典雅出色在韓慕廬先生烟草詩之上又薄暮驟雨云黑雲鬱鬱西南來狂飈挾勢驚奔雷夕陽倉卒收不及劃住半壁青天開句殊奇險余自幼聞姨母章氏嫁非其偶時誦巧妻常伴拙夫眠之句不知何人所作後閱謝在杭集方知故是謝詩其詞曰痴漢偏騎駿馬走巧妻常伴拙夫眠世間多少不平事不會作天莫作天

從弟鳳儀旅店云迎面有山皆客路問心無日不家鄉呂柏岩有句云天果有涯行易盡家雖無路夢常還

余知江甯時和尹公通字韻云身如雨露村村到心似玲瓏面面通史文靖公聞之笑曰畫出一个尹元長

長沙太守陳焱陝西人與余在蘇州花宴當歡口號云此地若教行樂死他生應不帶愁來未二年竟卒然他生無愁亦可知矣

某公子惑溺狹斜幾於得疾父將笞之公子獻詩云自憐病體輕於葉扶上金鞍馬不知父爲霽威所惑者亦有句云朝朝梳洗臨江水一路芙蓉不敢開又曰世間未有無情物蠟燭能痴酒亦酸

方敏恪公六十一歲生兒當八月十四日賦得子詩云與翁同甲子添汝作中秋

余酒席歌場乘人鬪捷之作多不載集中乙未二月避生日於蘇州有舊識女校書任氏以扇索詩余題云隔年相見倍關情樓上金燈樓下箏難得相逢好時節再遲三日是清明小市長陵路狹斜當簷一樹碧桃花果然六十非虛度半醉天台玉女家校書喜次日引余見其第四妹妹亦持扇索詩余題云玉立長身窈窕姿相逢從此惹相思雲翹更比雲英弱知是瑤臺第四枝若非月姊通消息爭得元霜見少君一樣珍珠兩行字替他題上藕絲裙後任家姊妹逢能文之客必歌此四章不落一字亦慧人也余初意慶六旬欲傲康對山集名妓百人唱百年歌而不料稱觴之日僅得五人御史蔣用庵同席後將往杭州留詩見贈云喜是尋芳到未遲唐昌觀裏正花時芝蘭九畹春如許却讓芝房第一枝

謂仙芝校書

風月東南

屬主盟買花親自載花行未知桃葉曾迎否先占楊州小杜名壽域歡場不易全介眉見說有初筵分明一樣稱觴酒纖手扶來便欲仙館娃回首夢虛無又挂風帆西子湖不識玉釵羅袖畔可曾閒憶到狂夫余後四年再過蘇州任氏姊名翠筠者持舊扇相示紙已破矣猶裝裹護持爲余唱曲余感其情再題二絕云四年前贈扇頭詩多謝佳人好護持不是文君才絕世相如琴曲有誰知爲儂重唱玉玲瓏嚙嚙鶯聲繞畫屏一曲歌終人一世那堪頭白客中聽

蘇州太守孔南溪風骨冷峭權貴不敢以情干青樓金蓮仙以事挂法一時交好無能爲之道地乃遣人至白下求余關說余與金甚疎僅半面耳竊念書中語倘不佯爲親狎轉生孔之疑乃寄札云僕老矣三生杜牧萬念俱空只花月姻緣猶有狂奴故態今春到治下欲爲

尋春之舉而吳宮花草半屬虛名接席銜杯了無當意惟女校書金某含睇宜笑故是矯矯於庸中遂與探梅鄧尉而別刻下接蕭娘一紙道爲他事牽引就翰黃堂將有月缺花殘之恨其一切巔末自有令甲憑公以惠文冠彈治之非僕所敢與聞召念此小妮子蕉葉有心雖知捲雨而楊枝無力祇好隨風偶茵溷之悞投遂窮民而無告似乎君家宣聖復生亦當在少者懷之之例而必不以杖叩其脛也且此輩南迎北送何路不通何不聽請於有力之家而必遠求數千里外之空山一隻可想見夫子之門牆壁立萬仞而非僕不足以替花請命耶元微之詩云寄與東風好抬舉夜來曾有鳳凰棲敬爲明公誦之孔得札後覆云鳳鳥曾棲之樹託抬舉爲東風惟有當作召公之甘棠勿剪勿伐而已二札風傳一時未二年余又往蘇州過京口已解纜矣丹徒徐令挽舟相留道妓戴三與太守淮樹章公司閤者狎章知之逐闥入而不罪戴戴往城隍廟焚香還願一廟譴然章怒其張揚嚴檄拘訊將使荷校以狗徐婉求不聽乞余解圍余召見戴三則霧鬢風鬟春秋老矣然馬骨千金不可以不援手也草札與太守云昔錢穆父刺常州宴客將筮一妓妓哀請錢云得座上歐陽永叔一詞故當貸汝歐公爲賦一闋遂釋之僕雖非永叔而公則今之穆父也請爲二章以當小調詞曰東風吹散野鴛鴦私燕神前一瓣香爲祝長官千萬福緣何翻惱長官腸樊川行矣一帆斜那有情留子夜家只問千秋賢太守可曾幾個斫桃花交書徐公卽挂帆還白下終不得消息殊惓惓半月後章寄函來開看只七字曰桃花依舊笑東風

漢陽戴喻讓詩有奇氣出吾鄉陳星齋先生門下有臨漳曲云暮雲深霸橋逝水天橫歌臺廢玉龍金鳳已千年古瓦還鐫銅雀字賣履分香兒女情讀書射獵英雄氣如何橫槊對東

風老年想作喬家婿末二句老瞞在九泉亦當笑倒又咏雪云未添庾嶺三分白預借章臺一月花

邵子湘作韻畧以爲江陽必不可通余讀史記龜策傳韓昌黎此日足可惜及李翱祭韓公諸篇江陽皆通猶以爲彼固合東青庚而通之甚廣未足據也及讀岑嘉州陪狄員外早秋登府西樓一篇云常愛張儀樓西山正相當車馬隘百井里開盤三江此短篇五古也唐人用韻甚嚴何濫通乃爾因而廣考之方知子湘之陋尙書論道經邦燮理陰陽戴記無服之喪以畜萬邦此六經通江陽之証也孔雀東南飛云東家第三郎窈窕世無雙樊毅西嶽碑云其德休明則有禎祥荒淫臊穢篤災必降柳敏碑云山陵元室建斯邦兮不飭不凋隕履霜兮三國志楊戲蜀君臣贊云保據河江家破軍亡晉語云二陸三張中興過江宋書大社之祝曰地德普施惠存無彊乃建大社以保萬邦漢紫玉歌云一日失雄三年感傷雖有衆鳥不爲匹雙荀勗正德舞歌云煥炳其章光乎萬邦庾信柳遐墓銘云起茲禮數峻此戎章長離宛宛刷羽凌江吳越春秋河梁歌云諸侯怖懼皆恐惶聲傳海內威遠邦呂溫昭陵功臣贊云經綸八方晏海澄江李翰裴旻射虎贊云弧矢之說以威四方羣虎旣夷狄人來降此漢唐樂府通江陽之証也至宋諸大家尤不勝屈指

余作駢體文押曹不丕字爲上聲爲人所嗤不知丕與不通又與負背通不止攀悲切也書曰是有丕子之責于天史記作負字索隱引鄭氏曰不讀爲負石經尙書亦作負子惟今之韻書摭摭淺漏未經收拾沈存中笑香山押餓殍爲夫又笑杜牧之杜秋詩厭飫不能飴誤飴糖之飴作飲噉用不知杜牧之用飴字本東漢童謠飴我大豆烹芋魁又晉盛彥傳婢使

蟪蛄炙飴之香山之押殍作平聲本唐韻數字下收殍作撫俱切猶之今平韻不收糾字而稽康琴賦亦竟作平聲押也

玉臺新咏實國風之正宗然有不可學者如湘東王春日一句用兩新字鮑泉沈約有詩八首以五言一首爲題如秋衰悲落桐之類反覆千言殊覺可憎爲唐人試帖賦得題所自仿也

人無酒德而貪杯勺最爲可憎有某太守在隨園賞海棠醉後竟弛下衣洩於庭中余次日寄詩戲之云客是當年夷射姑不教虎子挈花奴但驚羸者此陽也誰令軍中有布乎頭禿公然幘似屋心長空有腹如瓠平生雅抱時苗癖日縛衣冠射酒徒

年家子龔友青年好學來誦其白門小住云秋生黃葉聲中雨人在清溪水上樓余爲嘆賞臨別忽向余正色云友不好名先生切勿以友詩告人余雅不喜曰此子矜情作態局面太小己而竟不永年

余哭鄂制府虛亭死節詩云男兒欲報君恩重死到沙場是善終丙戌 天子南巡傳文忠公向莊滋圃新參誦此二句曰我不料袁某才人竟有此心胸聞係公同年我欲見之希輔告之余雖不能往謁而心中知己之感惻惻不忘第念平生詩頗多公何以獨愛此二句後公往緬甸受瘴得病歸薨方知一時感觸未嘗非識云

鄂公拈香清涼山過隨園門外指示人曰風景殊佳恐此中人必爲山林所誤有告余者余不解所謂後見宋人題呂仙一絕曰覓官千里赴神京得遇鍾離蓋便傾未必無心唐社稷金丹一粒誤先生方悟鄂公誤字之意

宋劉子儀爲夏英公先得樞密乃咏堦子詩曰空呈厚貌臨官道更有人從捷徑過 本朝朱草衣咏雪云正愁前路迷樵徑先有人行路一條陳古漁看桃花云回頭莫羨人行處曾向行人行處來

同年李竹溪棠性誠慤而詩獨清超感懷云罷官便有閒人集才老旋生後輩嫌得家書云急開翻惱緘封密朗誦頻教句讀差其子燧年十歲時余命屬對水仙花渠應聲曰羅漢松平仄雖不協而意境極佳遂大奇之歸河間後見懷云韋司風味陶潛節野鶴閒雲伴此身四海聲名雙管筆六朝花柳一家春鬚眉每向詩中見函丈偏從夢裏親此日著書深幾許瓣香心事屬何人末二句其自命亦不凡矣

杭州張有虔先生年九十三 皇上欽賜舉人余自幼蒙提攜故求其詩不得得其子名濟川號南臯生者微雨云無聲著林木有色引莓苔欲雪云風號平野急雲重暮山連

有人誦常州汪玉珩咏淚佳句云江干斑竹墻陰草壺內紅冰鏡裏潮余以爲不如其第一首云商女含愁歌一曲楚妃無語過三年更覺耐想又偶成云高閣對層巒屋角烟蘿接山雨欲來時蕭蕭下黃葉

胡稚威云詩有來得去得存得之分來得者下筆便有也去得者平正穩妥也存得者新鮮出色也

劉霞裳與余論詩曰天分高之人其心必虛肯受人譏彈余謂非獨詩也鐘鼓虛故受考笙竽虛故成音試看諸葛武侯之集思廣益勤求啓誨此老是何等天分孔子入太廟每事問顏子以能問於不能以多問於寡非謙也天分高故心虛也

梁文莊公之兄啟心字守存入翰林後卽乞歸養其子山舟侍講亦早乞病使其弟敦書仕於朝一門家風如此守存除夕約同人遊吳山不果乃寄詩云何堪歲盡役遷延夙約都爲俗事牽多謝分吟留一席不妨屬和待明年空山響答千門爆落日還迷萬瓦烟相見諸公高會處下方人指地行仙除夕云舊賜宮袍聊一著新頒春帖嬾重書晚過山庵云清依古佛原無夢老笑秋蟲尙有絲山舟性不近婦人不宴客亦不赴人之宴惟余還杭州卽具華饌一主一賓相對而已故余寄懷云一飯矜嚴常選客半生孤冷不宜花山舟有反遊仙云漫說長生有秘傳餐芝絕粒幾經年登仙直是尋常事雞犬由來亦上天瑤林瓊樹生來有玉宇雲樓望裏深上界不聞阿堵貴道人偏要煉黃金曾侍朝正三殿來遙瞻旌節下蓬萊如何一片飛鳬影也被人間網得回賺他劉阮是何人畢竟迷樓莫當眞我是天台狂道士桃花多處急抽身擾擾蜉蝣柰若何寸田尺宅竟蹉跎自從偷吃嵇康髓只覺胸中塊壘多尹望山相公四督江南諸公子隨任未久多仕于朝惟似村以秀才故不當差常侍膝下詩才清絕余駢體序中已備言之猶記其訂余往過云清談相訂菊花期正慰幽懷入夢時空谷傳書鴻屢至閒庭掃徑僕先知關心尙憶他鄉客寄詩三兄因病翻添數首詩聞道芒鞋將我過倚闌只恨月圓遲綯春園云莫喚池邊貪睡犬隔林恐有看花人乙酉別去庚子八月忽奉太夫人就燕湖觀察兩峯之養重過隨園見和云迎人雞犬閒如舊滿架琴書賣欲無臨別云故人垂老別歸舫任風移退一步來想斯遊本不期似村名慶蘭

無錫杜紫綸先生選叩彈集以晚唐爲宗同余召試誦送春一聯云自是東風無著處本來西子有歸時眞晚唐也黃莘田亦云人自夸東晉詩惟愛晚唐

嘉禾徵士曹廷樞古謙與葛卜元同教習宗學葛北方人長于考據自負博雅而曹專工詞章二人不相能虞山蔣公滿洲世公各有所庇遂相參劾古人洛蜀之分皆由門下士起也曹詩自佳咏春雨云兩兩溪邊水鳥呼漸春檐際濕模糊憑欄花重紅疑滴隔座山橫翠欲無吟苦莫愁春冷淡病多偏穩睡工夫捲簾自愛虛無景未要瀟湘入畫圖

杭州柴南屏先生名謙作中書時和聖祖冬至詩有雪花欲共梅花落春意還同臘意舒之句聖祖謂有翰苑才超陞御史余與其曾孫景高交先生年八十餘矣咏西湖云月出慣留歌舞席風生不送別離船

世有口頭俗句皆出名士集中世亂奴欺主時衰鬼弄人杜荀鶴詩也今朝有酒今朝醉明日無錢明日愁羅隱詩也一朝權在手便把令來行崔戎酒籌詩也閉門不管窗前月分付梅花自主張南宋陳隨隱自述其先人詩也大風吹倒梧桐樹自有旁人說短長宋人笑趙師舉欲附范文正公祠堂詩也晚飯少吃口活到九十九古樂府也

見七修類稿所引難將一人手

掩得天下目曹鄴詩也易求無價寶難得有情郎女真蕙蘭詩也一舉首登龍虎榜十年身到鳳凰池張唐卿詩也平生不作皺眉事世上應無切齒人邵康節詩也兒孫自有兒孫福莫與兒孫作馬牛徐守信詩也是非只爲多開口煩惱皆因強出頭自家掃去門前雪莫管他家瓦上霜並見事林廣記黃泉無客店今夜宿誰家見唐入逸詩

河督姚小坡作別駕時以祭墓二字命題余宰江甯時無子咏祭云血食滿天下但看所樹恩羞將好魂魄飢飽仗兒孫

余作庶常時寓年家花園同年吳自堂與其兄飛池借寓園中飛池與吳女金娘有三生之

約畏妻不敢聘金寄詩云殘淚未消和影拭舊書重展背人看詩既佳書法亦秀媚

雲間沈大成字學子皓首窮經多聞博學嘗見古廟有九原丈人之碑不知所出後閱十洲記始知乃海神司水者也因作九原丈人考一篇贈邵檀波云異書勸後兼金重古硯磨多似白深即事云樓頭風定鐘初動湖上雲開舫漸行

浙中遂昌教諭王世芳字芝圃年一百十歲入都祝 太后萬壽賜翰林侍講銜還鄉陳太

常星齋贈詩云華皓何來雲水頭寵加新秩返扁舟酒錢未卜憑誰與壺藥翻叨爲我投薄宦夢驚山北檄散仙行逐海東鷗獨留佳話傳臺閣曾與耆英大父遊王面長尺許腰若植鱗自言少居鄉遭耿逆之變與諸妹豆棚閒坐一妹頭忽不見蓋爲飛砲擊去也與第三子同來白髮飄蕭背轉僂僂問其長子曰不幸夭亡矣問夭亡之年曰八十五歲乾隆辛未聖駕南巡有湖南湯老人來接 駕年一百四十歲 皇上先賜匾額云花甲重周又賜云古稀再度

余夏間惡蚊常誤批頰甚痛而蚊乃飛去偶讀葉聲木譙蚊詩不覺大快詞曰虎狼偶食人猶寢其皮獨怪蚤蠹蚊嗜人甘如飴蟣蝨我自生自孽將怨誰蚤出塵土間跳梁亦暫時爾蚊何爲者薨薨聲殷雷訂盟如點將歃血遣伙飛聚昏更爲市利析秋毫微穿衣巧刺綉中膚驚卓錐深入石飲羽潛侵劍切泥三伏涼夜好清風吹滿懷時方愛露坐鳴鏑一聲來悞憤自批頰悵望空徘徊亦或中老拳磔裂殲渠魁無奈苦搔痒汗黏變瘡痕咄么麼蟲陰毒乃如斯長啄不擇肉呼吸若乳兒怪底入夏瘦毛孔成漏卮安得通身手左右時交揮葉諱誠錢塘孝廉

王安崑字平圃予少在都中與交好常宿其家見其題尤貢甫墨竹云幾個琅玕幾點苔勝他五色筆花開分明滿幅蕭蕭響似帶江南風雨來買竹云南郊過雨綠生香底事勞人買竹忙我一出城君入市兩邊風味各分嘗又送羅兩峯歸邗上兼示舍弟瘦生云別時冰雪到時春萬樹寒梅炤眼新邂逅若逢江上客已歸須勸未歸人

余宰溧陽時有宦家女依祖母居私其甥陳某逃獲訊時值六月跪烈日中汗雨下而膚理玉映陳貌寢以縫皮爲業余念燕婉之求得此戚施殊不可解問女何供女垂淚云一念之差玷辱先人自是前生宿孽其祖母怒甚余以卓茂語再三諭之答甥而以女交還其家搜其篋有閨詞云蕉心死後猶全捲蓮子生時便倒含亦詩讖也隔數月聞被戚匪胡某賣往山東矣余至今惜之嘗爲人題畫冊云他生願作司香尉十萬金鈴護落花

宰江甯時有南鄉錢貢甫之子某買張某妻陳氏爲妾得價後屢詐不遂遂來控官余召訊之錢燒窰張爲其捧煤者也貌如石炭妻嫵然窈窕錢美少年能詩余意天然佳耦欲配合之而格于例乃發官煤免其笞有役某素黠探知官意密授錢計仍買歸焉錢故鄉居事過後余不暇再問消息後十餘年余遊牛首山路見繫繫者率三嬰兒捧香伏地問何人曰錢某也年來妻亡扶陳氏爲正室此三兒皆其所生某亦入上元學矣聞公遊山命我來謝獻詩云酌恩兩個山村雀含著金環沒處尋綠葉成陰滿枝子費公多少種花心

李笠翁詞曲尖巧人多輕之然其人有足采者如送周參戎之浦陽云儒將從來重君其髯絕倫三遷無喜色百戰有完身灰裏求遺史刀邊活故人仙華名勝地細柳正堪屯嫠甯庵云誰引招提路隨雲上小峯飯依香積煮衣倩衲僧縫鼓吹千林草波濤萬壑松楞嚴聽未